



CH-7144 Vella, 07/08/2015

Novitads dalla suprastonza communal

Punts reit da viandar Lumnezia

La senda da viandar publica sur la Val da Silgin ei demolida. La suprastonza communal ha decidu da construir ina punt da pender sur la val vi e concediu il credit da CHF 88'560 per realisar il project. La punt munta in'attracziun turistica e vala sco prototip per ulteriuras punts enteifer la reit da viandar dalla vischnaunca. Medemamein duei la punt sur il Glogn da Genastga Degen - Surcasti vegnir sanada. Ils projects vegnan finanziats cun mieds che vegnan incassai per taxas turisticas. Ulteriurs objects ein planisai.

Plaz da deposit a Suadetsch

La suprastonza communal ha decidu da schar a tscheins cumparts dil plaz da deposit a Suadetsch a Savoldelli Tanno SA ed agl Uffeci da construcziun bassa dil cantun Grischun. Ina cumpart dil plaz ei reservada per agen diever dalla vischnaunca. Il rest dil plaz a disposiziun vegn publicaus per affittaziun.

Rempars encunter ruschnadas da neiv a Cumbel

Igl Uffeci digl uaul e prighels dalla natira Regiun Surselva realisescha a Cumbel/Casanova sin incarica dalla vischnaunca rempars encunter ruschnadas da neiv per proteger zonas da habitar.

Survetschs da bus da skis

Cun l'entschatta dalla stagiun d'unviern 2015/2016 vegn il survetsch d'in bus da skis cun passagiers naven da Glion introducius. La suprastonza communal ha approbau ina cunvegrientscha corrispundenta per in onn. La finanziaziun succeda sur las pendicularas e la vischnaunca Lumnezia. Cun quella purschida spera ins da carmalar dapli hosps en Lumnezia.

Bus transport da personas

La suprastonza communal ha decidu da comprar in bus per il diever da transports da personas. Entochen ussa procurava Lumnezia Turissem per quei survetsch cun prender a tscheins in bus.

Loipa Degen

La proxima stagiun d'unviern duei in ulteriur tschancun dalla loipa a Degen vegnir illuminada cun cazzolas moviblas. Cheutras sa vegnir desistiu da preparar ina loipa speciala per la notg e la purschida per ils curridders da cuorsa liunga semigliura. Plinavon vegnan preits da teilas postadas en differents loghens ch'ei exponi fermamein al sulegl per evitar che la neiv luoi memia spert.

Loghens muntagnards amicabels per la giuventetgna

La gruppa svizra per las regiuns da muntogna SAB vul scaffir in label davart loghens muntagnards amicabels per la giuventetgna. En quei connex ha in inscunter cun representants dallas uniuns da giuventetgna giu liug a Cuschnaus. Ils resuns ein stai positivs ed ins ei securvegnius che la vischnaunca Lumnezia inoltreschi l'annunzia per retscheiver il label.

Diever localitads dall'anteriura canzlia communal Morissen

Las localitads dall'anteriura canzlia communal a Morissen vegnan messas a disposiziun el futur alla musica da Vignogn, alla musica giuvenila Lumnezia ed alla gruppa da tamburs Lumnezia per lur emprovas da musica.

Plaz da pausa e da giug casa da scola Vella

Il plaz da pausa e da giug sper la casa da scola a Vella vegn engrondius sin l'entschatta digl onn da scola.

Sustegn finanziel Uniun da teater Cuschnaus

L'Uniun da teater Cuschnaus vegn a presentar il mars 2016 „La lingia blava“. La suprastonza communal ha decidu da sustener il project cun ina contribuziun finanziala da CHF 4'000 e da metter a disposiziun gratuitamein la halla a Degen per las emprovas.

Elecziun d'ina persuna per schubergiar la casa communal

Suenter che Claudia Casanova ha abidcau sia piazza sco pedela dalla casa communal a Vella sin l'entschatta october 2015, ei Gerhard Collenberg da Morissen vegnius elegius en quella piazza.

Filmar a Pleif

La televisiun svizra realisescha in film en connex cun la construcziun digl emprem tunnel da viafier dil Gotthard. Ina part dil film vegn realisada il settember a Pleif.